



UKA2017/130

16/10-2017

Nivi Olsen

Pisortatigoortumik marlunnik inuiattut erinarsuuteqarnerput nalilersoqqittariaqarnerlutigu apeqquteqaat aallaavigalugu oqallisissiaq.

(Inatsisartunut ilaasortaq Peter Olsen, Inuit Ataqtigiit)

Aallaqqaammut oqaatigissavara "Nunarput Utoqqarsuanngoravit" aamma "Nuna asiilasooq" tusarnersorsuummata tusarnerilu tamaaasa uummatikkut attortittarama.

Inuiattut erinarsuutigut pillugit nalinnaasumik oqaatigissavara, ersarimmat erinarsuutit inuiaqatigiittut misigissusermut pingaaruteqartut. Tamattami isikkamik arsarluni nunanut allanut unammisartut aallartinnngilaattaani takusimagunarpaput tusarnaralugulu Københavnimi Parken ulikkaaqqasumi erinarsorneqartoq "Der er et yndigt land".

Aamma assinganik ersarittaqaq, unammisuni guultinnattut killittittarmata erfasoq amuneqaraangat inuiattut erinarsuutip atorneqarnerani.

Inuiattut erinarsuuteqarneq pillugu oqallinneq ukiaq manna aamma nunarsuup sinnerani sakkortusivoq, amerikami præsidenti Donald Trumpip NFL-mi unammisartut arlallit isornartorsiormagit amerikamiut inuiattut erinarsuutaannut ataqinninnginnerarlugit.

Naatsumik oqaatigalugu tunngaviuvoq unammisartuq tusaamasarsuaq Colin Kaepernick unammisissaq sioqqullugu inuiattut erinarsuutip atorneqarnerani nikuikkumangimmat paaseqqullugu USA-mi qernertormiut naqisimaneqartut immikkoortinneqarlutillu. Tamannalu Trumpip kamaatigeqaa. Unammisartulli amerlanersaasa Kaepernicksip akerliussutsimik takutitsisinnaatitaanera illersorpaat. Oqallinersuaqarpoq tamannalu assersuutissaalluarpoq, inuiattut erinarsuutip qanoq misigissutsinik qaffatsitsisinnaatigineranut.



Siusinnerusukkut oqaatigeriikkattut isumaqarpunga inuiattut erinarsuutigut tusarnersorsuusut uangutsinnillu perruualartitsilersinnaalluartut. Massakut "Nunarput utoqqarsuanngoravit" unammersuartoqassatillugu atorneqartarpoq tamannalu ajoriinnagassaanngitsoq Demokraatini isumaqarpugut.

Ajornartorsiutiginnilarput marlunnik inuiattut erinarsuuteqarnerput aamma ajornartorsiutiginnilarput naligiisillugit atorneqartarneri.

Tamassi oqalliseqataalluarnissassinnik kissaappatsigit.